

**Date – 10/05/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Chief Minister Pu Lalduhoma'n Mizo thalaite ah hmasawna a thleng mek tih sawiin mahni inringtawk, invawng leh kaihhruai nuam tak an pung chho mek a ti.
2. Vawiin hi "Nute Ni' (Mothers' Day) a ni a, Mizoram hmun hrang hrangah Nute hmangaihna lantirna hun hman a ni.
3. Sorkar laipuaia Ministry of Panchayati Raj hnuiaia Deen Dayal Upadhyay Panchayat Satat Vikas, 2025 ah Kawrthah North Village Council chu 'Clean & Green Panchayat' huangah pakhatna a ni.
4. TVK hruaitu C. Joseph Vijay-a kaihhruai Tamil Nadu sorkar thar lak luh a ni.



**CM**

Chief Minister Pu Lalduhoma'n Mizo thalaite ah hmasawna thleng mek tih sawiin mahni inringtawk, invawng leh kaihhruai nuam tak an pung chho mek hmasawna thar a ni a ti.

2<sup>nd</sup> Mizo Battalion NCC bultuma Lunglei Thuamluaia Muala National Cadet Corp (NCC) Fest leh 2 BN MAP Ground-a Parasailing Camp a hmanpui na ah he thu hi sawiin Pu Lalduhoma chuan Mizo thalaite hmasawna ah NCC chu a pawimawh hle a ti a, thalai mahni inringtawk, invawng leh thuawih an pung zel tih sawiin ram hmasawna ah thalaite hmasawn an hmu chu lawmawm atih thu a sawi a ni.

Chief Minister chuan thalai tam takin nunkawng dik an zawh mek lain Mizorama ruihhlo hluar zel chuan thalai thenkhat nun a tichhe mek a, kaihruaitu tha tak an mamawh tih sawiin NCC chuan thalaite kaihhruai kawngah nasa takin tha a thawh tih sawiin naupangte chu mahni inthunun thei, taima, tawrhchhel leh mi tumruh takah an chhuah thin a ti a, Sipaiah kal zui kher lo mah se an eizawna kawngah an tangkaipuizui thin tih a sawi a ni.

Pu Lalduhoma chuan Mizo thalai tam tak BSF, CAPFS, Agniveer leh Mizoram Police-ah an lut chho zel chu lawmawm atih thu sawiin hun reilote chhunga hmasawna an hmuh chu chhuanawm atih thu a sawi bawk.

Chief Minister chuan NCC Fest ah Mizo thil chi hrang hrang chhawp chhuah ani chu lawmawm atih thu leh khawtlang nena thawkhoa Mizo hnam ziarang tih hmasawn kawnga hna an thawk chu chhuanawm atih thu a sawi bawk.



## UNNATI SCHEME

Commerce and Industries Minister Pu F Rodingliana'n Mizoram atanga UNNATI Scheme hnuai inziak lut an tlem chu pawia tih thu a sawi.

Sawrkar laipui hnuai Department for Promotion of Industry and Internal Trade (DPIIT) leh Mizoram sawrkar hnuai, Department of Commerce & Industries tangkawp chuan, UNNATI Scheme zirchianna hun tunhnai khan Royale Lalawi Hotel Conference Hall, Khatla-ah an buatsaih a. He hun hmanpuitu Pu F. Rodingliana chuan ram leilung in a zir tawk loh avanga, hun rei tak chhung Mizoram a investor ten luh an hreh thin na chu KMMTTP in a thlak danglam mek a ni a ti .

Mizoram International border thui tak a neih te chu a hlutna hre tur leh hemi behchhan hian UNNATI Scheme hmang tangkai thiam, investor tam zawk hip lut thei tura tan la zual zel turin kal khawm te chu a chah a. UNNATI Scheme hnuai inziak lut an tlem lutuk chu pawia tih thu sawiin, sawrkar laipui lama thuneitute pawhin, awlsam zawka inziah luh a, mi tam zawkin he scheme hi an hman tangkai ngei theih nan, a kalphung ti awlsam se a duh thu a sawi bawk.

Minister hian UNNATI Registration Certificate sem nghalin, registration approved tawh mi pasarih hnenah UNNATI registration certificate a hlan a ni.

DPIIT Director, Rajesh Panwar-a'n a tarlan dan in, UNNATI Scheme hnuai Mizoram tan cheng vaibelchhe 453 dah a nih laiin, mi pasarih chiahin registration ti in, application 26 chauh Mizoram atanga an la dawn thu a sawi a. Mizoram chu Zone – B, hlawkna tam zawk tel theihna zone a awm an nihna te hria a, tun aia nasa zawka scheme hi hmang tangkai turin kalkhawmte chu a chah bawk.



## **MOTHER'S DAY**

Vawiin hi "Nute Ni" (Mothers' Day) a ni a, Mizoram hmun hrang hrangah Nute hmangaihna lantirna hun hman a ni.

May thla Pathianni vawi 2-naa hman thin Mothers' Day hi Nute hriatrengna leh chawimawina hun atana buatsaih thin a ni a, Salvation Army India Eastern Territory-ah chuan Pathianni chawhma inkhawmah hman a ni tlangpui thin a, Naupang leh thalaiten pangpar leh thilpek hlu tak an nute hnenah an hlan thin a, Nu te pawimawhna lam hawi Pathian thuchah ngaihthlak anih bakah Nu chan tawhte pawhin an nute hriatrengna leh zahna entirna ni atan an hmang thin bawk ani.



## **MOTHER'S DAY : SOCIAL WELFARE MINISTER**

Social Welfare & Tribal Affairs Minister Pi Lalrinpui'n Nute Ni pualin Nu zawng zawngte chibai a buk a, Nu te hmangaihna lantir turin mi tin a sawm.

Minister hian a Social Media kaltlangin Nu te ni pualin Nu zawng zawng chibai a buk a, Nu pawimawhna chu inchnung khurah chauh anilo tih sawiin khawtlang leh ram rawngbawlina ah dinhmun pawimawh tak luah tu anni a ti a, hruaitu ropui tak tak lo ni tawh ten Nute chu hmangaihna bul ani tih hriain an lo dah pawimawh thintih sawiin, Nu te ni puala mahni Nu te theuh hmangaihna lantirnan hmang turin mi tin a sawm a ni.

Pi Lalrinpui chuan Nu nei tawh lo ten an Nute atanga hmangaihna an dawn thin chu luanchhuah tir nana hmang turin a chah a, hmun hrang hranga Nute chibai bukin an hlutzia hre thar theuh turin mitin a sawm a ni.



## **CLEAN & GREEN PANCHAYAT' AWARD**

Sorkar laipuia Ministry of Panchayati Raj in Deen Dayal Upadhyay Panchayat Satat Vikas, 2025 hnuaiia lawmman dawngtute a puan ah Kawrthah North Village Council chu 'Clean & Green Panchayat' huangah pakhatna a ni.

Ministry of Panchayati Raj in lawmman a pekchhuah hi faina kawnga hnathawk tha, ramngaw leh nungcha venhim kawnga thawk tha leh khawtlang hmasawna atana thawk tha te an ni a, Kawrthah North hian an khaw faina bakah ramngaw venhim kawngah hna an thawh that avangin he lawmman hi an dawng a ni.

Deen Dayal Upadhyay Panchayat Satat Vikas Puraskar lawmman hi huang hrang hrangah then niin Mizoram bakah hmarchhak biala khaw dang te pawhin lawmman hi an dawng a, Lawmman dawng panchayat 42 awmin Kawrthah lawmman dawna 'Clean & Green Panchayat' hian pawisa fai cheng vbch khat a keng tel a, lawmman hi thla leh June ni 3 hian New Delhi-ah sem a ni dawn a ni.



## **KHAWBUNG FARMER**

Khawbung Block huam chhunga Leilet neitu engemaw zat chuan, buh chin loh lai, December thla atanga May thla thlengin an leiletah Nihawi an ching a. Heng nihawi te hi tun lai hian seng mekin, nihawi ching tam zawk chuan tin 50 atanga tin 100 an thar tlangpui a; a thar tam ber chuan tin 250 an thar ani.

Kuthnathawktute chuan Nihawi chi hi têt ei chi (edible oil) atana ching an nih thu an sawi a. Nihawi chi tin 1 atang hian Têt litre 2 leh tlem a chhuak thei a. Têt litre 100 chuang an thar hian kum tuana an hriak mamawh a tum bakah engemaw zat hralh chhuak an awm a, Buh chin loh laia Nihawi chin hian a kum leha Leilet siam a tiawlsam a, buh pawhin a that phah niin an sawi bawk a ni.



## **TAMIL GOVT SWORN IN**

Tamil Nadu Chief Minister atan Tamilaga Vettri Kazhagam (TVK) dintu, C. Joseph Vijay-a, tukin khan lak luh a ni a, Nehru Indoor Stadium-a inkhawm buatsaihah state Governor, Rajendra Vishwanath Arlekar-a'n rinawmna thu tiam tirin a la lut a ni.

Chief Minister lak luh rual hian cabinet minister atan mi 9 lak luh an ni bawk a, sorkar thar lak luh inkhawmah hian sorkar mipawimawhte bakah Cong hruaitu, Rahul Gandhi leh Tamil film industry mi thahnem tak an tel a ni.

Seat 234 awmna Tamil Nadu assembly-ah hian TVK hi Cong, CPI, CPI(M), VCK leh IUMML-ten an thlawp a, Pu Vijay-a hi kum 1967 hnua DMK emaw AIADMK emaw nilo Chief Minister hmasa ber a ni.



## **HANTAVIRUS**

Khualzin phur kual chi Dutch hnam puanzar inzarna lawng lian MV Hondius chhungah Hantavirus hri a leng nia hriat vangin he lawng hi Spain thliarkar pakhat Tenerife-ah koh kir a ni a, hetah hian khualzinte chu lawng atanga thiar chhuak vek turin WHO leh European Union-ten Spain an hriattir a ni.

Tun thla ni 2 khan he lawnga chuang mi engemawzatin thawk lamah harsatna nasa tak an neih thu leh mi 2 an thih bakah midang pakhat, na taka a damloh thu, WHO hian a dawng a, May ni 4-ah mi 4-in Hantavirus an kai tih hmuhchhuah a ni. May ni 8-ah hri kai 8 nemngheh 8 awm tawhin mi 3-in an thihpui tawh bawk a, hri kai zinga zaa 38-in an thihpui a ni.

Hantavirus cardiopulmonary syndrome (HCPS) hi he hrik pai sazu atanga kaichhawn theih a ni a, he hri hi Europe leh Asia-ah te hmuh a ni tawh a, khawsik sang tak tak a thlen theih bakah kal leh thisen dawt-te a tichhe thei a, tun dinhmunah mihring leh mihring inkaichhawng hriat tur a la awm lo a ni.